

撰集百緣經卷第三

承三

吳月支優婆塞支謙譯

授記辟支佛品第三

化生王子成辟支佛緣二十一

佛在摩竭提國將諸比丘漸次遊行到恒河

側見一故塔承三毀落崩壞無人修治時諸比丘

白佛言世尊此是何塔朽故乃爾無人補治

爾時世尊告諸比丘汝等諦聽吾當為汝分

別解說此賢劫中波羅柰國有王名曰梵摩

達多正法治化人民熾盛極大豐樂無有兵

革軍征鬪諍災疫疾病饒諸象馬牛羊六畜

及諸珍寶唯無子息禱祀神祇求索有子巨

不能得時土園中有一池水生好蓮華其華

開敷有一小兒結跏趺坐有三十二大人之

相八十種好口出優鉢羅華香身諸毛孔有

栴檀香時守池人以狀白王甚懷歡喜將其

后妃往到園中見此小兒喜不自勝欲前抱

下兒便為王而說偈言

大王常所求 故來稱王願 見無子息故

今來為王子

爾時大王后妃媵女聞說此已莫不歡喜即

抱小兒還宮養育年漸長大隨其行處有蓮

華生身毛孔中有栴檀香因為立字名栴檀

香時此小兒尋自觀察足跡行處所出蓮華

初則鮮好未久萎落便自思惟我今此身會

當歸爾心悟非常成辟支佛身昇虛空作十

八變尋入涅槃爾時大王后妃媵女號天涕

哭攝其尸骸耶旬燒之收取舍利起塔供養

是故今者是彼塔耳時諸比丘復白佛言此

辟支佛宿植何福受斯果報唯願世尊敷演

解說爾時世尊告諸比丘汝等諦聽吾當爲汝分別解說乃往過去無量世中波羅柰國有佛出世號曰迦羅迦孫陀於彼法中有一長者財寶無量不可稱計其父崩亡子與其母各自分居時長者子甚好色欲見一姪女甚適其意以金百兩方聽一宿漸經多年財物蕩盡更無所與遮不聽宿懇求請願見一宿姪女語言汝今若能得一好華來與我者聽汝一宿時長者子每自思惟我今家中無有財物可用買華以遺姪女思惟是已今王塔中必有好華我當盜取持用與之可得止宿然彼塔門有人守護無由得前尋從伏竇入其塔中盜取好華以與姪女乃聽止宿至於天明其人身體生諸惡瘡甚患苦惱痛不可言喚諸良醫以瞻療治云須牛頭栴檀

用塗瘡上可得除愈時長者子深自思惟家無財物即賣舍宅得六十萬金錢尋用即買牛頭栴檀方得六兩頓用塗瘡語良醫言我今所患乃是心病汝今治外乃可差乎作是語已即持所買牛頭栴檀擣末六兩入其塔中發大誓願如來往昔修諸苦行誓度衆生隨其厄難我今此身墮一生數唯願世尊慈哀憐愍除我此患作是誓已即以所未牛頭栴檀二兩用償華價二兩至心供養二兩求哀懺悔瘡尋除差身諸毛孔有栴檀香聞此香已喜不自勝發願出去緣是功德不墮惡趣天上人中隨其行處生好蓮華身諸毛孔恒有香氣佛告諸比丘欲知彼時長者子栴檀塗塔者今此辟支佛是爾時諸比丘聞佛所說歡喜奉行

小兒散華供養佛緣二十二

佛在舍衛國祇樹給孤獨園爾時世尊將諸比丘著衣持鉢入城乞食至一巷中有一婦女抱一小兒在巷坐地時彼小兒遙見世尊心懷歡喜從母索華母即與買小兒得已持詣佛所散於佛上於虛空中變成華蓋隨佛行住小兒見已甚大歡喜發大誓願以此供養善根功德使我來世得成正覺過度衆生如佛無異爾時世尊見此小兒發是願已佛即微笑從其面門出五色光遶佛三匝還從頂入爾時阿難前白佛言如來尊重不妄有笑以何因緣今者微笑唯願世尊敷演解說佛告阿難汝今見此小兒以華散我不阿難白言唯然已見此小兒者以華散我於未來世不墮惡趣天上人中常受快樂過三阿僧

祇劫成佛號曰華盛廣度衆生不可限量是故笑耳爾時諸比丘聞佛所說歡喜奉行女人以金輪擲佛上緣二十三

佛在王舍城迦蘭陀竹林時彼國中有一商主名曰浮婆將諸商客入大海中採其珠寶其婦少壯容貌可觀憶望其夫晝夜愁念速得還家即便往詣那羅延天所作呪言天若有神不違人願使我夫主安隱速還我今當作金銀瓔珞以報天恩若不還者我以糞屎不淨臭處毀辱天身作是誓已未經幾時果如其願安隱還家甚懷歡喜即造金銀瓔珞環玕將諸侍從往詣天祠路值如來將諸比丘入王舍城時彼女人見佛世尊三十二相八十種好光明普曜如百千日心懷歡喜欲以金銀瓔珞擲散佛上其從語言此非那

羅延天遮而不聽時彼婦女不從其教即以  
瓔珞擲散佛上於虛空中變成寶蓋隨佛行  
住見是變已深生信敬五體投地發大誓願  
我今以此散佛瓔珞善根功德使我來世得  
成正覺廣度衆生如佛無異發是願已佛即  
微笑從其面門出五色光遶佛三匝還從頂  
入爾時阿難前白佛言如來尊重不妄有笑  
以何因緣今者微笑唯願世尊敷演解說佛  
告阿難汝於今者見此婦女以金銀瓔珞散  
我上不阿難白佛唯然已見此婦女者於未  
來世不墮惡趣天上人中受諸快樂過十三  
劫成佛號曰金輪瓔珞廣度衆生不可限量  
是故笑耳爾時諸比丘聞佛所說歡喜奉行  
老母善愛慳貪緣二十四  
佛在舍衛國祇樹給孤獨園時彼城中波斯

匿王后宮嫫女名曰善愛年在老邁極大慳  
貪不好惠施却坐飲食時大目連欲化彼故  
著衣持鉢以神通力從地涌出住老母前從  
其乞食老母瞋恚不肯布施飯食已訖有一  
殘果及洗器水臭而不壞爾時目連即從乞  
索老母瞋恚尋即持與目連得已涌身虛空  
作十八變時彼老母見是變已心懷信敬歸  
誠懺悔即於其夜便取命終生曠野中在一  
樹下食果飲水以自存活致經數時波斯匿  
王將諸羣臣遊獵射戲馳逐羣鹿渴乏欲死  
遙見彼樹希望有水馳奔趣向去樹不遠有  
火焰起遮不聽近但遙見人坐其樹下王即  
遙問汝是何人在此樹下彼即答言我是波  
斯匿王后宮嫫女年在朽邁名曰善愛不好  
惠施命終生此唯願大王悲哀憐愍為我設

供請佛及僧使我脫此弊惡之身王即問言  
為汝設福可得知不彼人答言設福必得王  
自當見爾時波斯匿王聞是語已勅諸兵眾  
相去百步安置一人令聲相承還歸城內為  
其設供請佛及僧若彼得福使諸兵眾各各  
承聲須臾聞我令知虛實尋即為設請佛及  
僧呪願以竟彼樹下人百味飲食自然在前  
時波斯匿王以知為實即於佛前深生信敬  
佛為說法得須陀洹果爾時諸比丘聞佛所  
說歡喜奉行

舍香長者請佛緣二十五

佛在舍衛國祇樹給孤獨園時彼城中有一  
長者名曰舍香財寶無量不可稱計稟性賢  
柔敬信三寶每自思惟我今此身及諸財寶  
虛偽非真如水中月如熱時燄不可久保作

是念已往詣佛所前禮佛足却住一面而白  
佛言我欲設供請佛及僧唯垂聽許佛即然  
可還歸家中設諸餽饈遣使白佛食具已辦  
唯聖知時爾時世尊著衣持鉢將諸比丘往  
詣其家受其供已心懷歡喜取一小牀在佛  
前坐渴仰聞法佛即為其種種說法心開意  
解因發誓願以此供養善根功德使我來世  
得成正覺廣度眾生如佛無異發是願已佛  
便微笑從其面門出五色光遶佛三匝還從  
頂入爾時阿難而白佛言如來尊重不妄有  
笑唯願世尊敷演解說佛告阿難汝今見此  
舍香長者請設餽饈供養佛僧不阿難白言  
唯然已見此大長者以是供養善根功德於  
未來世九十劫中不墮地獄畜生餓鬼天上  
人中常受快樂最後身得成辟支佛號曰舍

香廣度衆生不可限量是故笑耳爾時諸比丘聞佛所說歡喜奉行

船師度佛僧過水緣二十六

佛在摩竭提國將諸比丘漸次遊行到恒河側時有船師住在河邊佛告船師汝今爲我

度諸衆僧船師答曰與我價直然後當度佛

告船匠我亦船師於三界中互相濟度出生

死海不亦快乎如鴛掘摩羅瞋恚熾盛殺害

人民我亦度彼出生死海如摩那答陀極大

憍慢卑下他人我亦度彼出生死海如憂留

頻螺迦葉愚癡偏多無有智慧我亦度彼出

生死海如是等比無量衆生我亦皆度出生

死海盡不索直汝今何故特從我索然後度

人爾時世尊如是種種與其說法心遂堅固

而不肯度時河下流復有船師聞佛所說心

懷歡喜便前白言我今爲佛度諸衆僧佛即然可莊嚴船舫喚僧乘船時諸比丘或在虛空或在中流或在彼岸時諸船師見佛及僧現如是等種種神變甚懷信敬歎未曾有敬禮佛僧佛即爲其種種說法心開意解得須陀洹果時船師索價直者見後船師度佛僧竟復見神變深生慚愧即便以身五體投地歸誠白佛至心懺悔請佛及僧佛即然可還歸家中設諸餽饈百味飲食手自斟酌供佛僧已取一小牀在佛前坐渴仰聞法佛即爲其種種說法心開意解因發誓願以此供養善根功德使我來世得成正覺廣度衆生如佛無異發是願已佛便微笑從其面門出色光遶佛三匝還從頂入爾時阿難而白佛言如來尊重不妄有笑以何因緣今者微笑

唯願世尊敷演解說佛告阿難汝今見是船師慚愧自責設供懺悔不阿難白言唯然已見彼船師者以是懺悔設供功德於未來世經十三劫不墮地獄畜生餓鬼天上人中常受快樂於最後身得成辟支佛號曰度生死海廣度衆生不可限量是故笑耳爾時諸比丘聞佛所說歡喜奉行

婢使以栴檀香塗佛足緣二十七

佛在王舍城迦蘭陀竹林時彼城中有大長者有一婢使稟性賢善敬信三寶每於一時爲其大家摩栴檀香暫出門外見佛世尊著衣持鉢將諸比丘入城乞食心懷喜悅尋還入內取少栴檀塗佛足上佛足神力令此香雲鬘垂布遍王舍城時彼女人見是變已倍生信敬即便以身五體投地因發誓願以

此香氣供養功德使我來世永離貧窮下賤之身早成正覺廣度衆生如佛無異發是願已佛便微笑從其面門出五色光遶佛三帀還從頂入爾時阿難而白佛言如來尊重不妄有笑以何因緣今者微笑唯願世尊敷演解說佛告阿難汝今見是長者婢使以栴檀香塗我足不阿難白佛言唯然已見此長者婢以栴檀香塗我足上善根功德於未來世九十劫中身體香潔不墮地獄畜生餓鬼天上人中常受快樂最後身得成辟支佛號栴檀香廣度衆生不可限量是故笑耳爾時諸比丘聞佛所說歡喜奉行

貧人拔提施佛樵木緣二十八

佛在舍衛國祇樹給孤獨園時彼城中有一貧人名曰拔提爲他守園用自存活每於一

日擔一樵木入城欲賣值城門中見一化人語貧人言汝今若能持此樵木用與我者我當施汝百味飲食時彼貧人聞化人語心懷歡喜即便以木授與化人化人答曰汝今持木隨我後來共詣祇洹當與汝食時彼貧人即相隨逐到祇洹中見佛世尊三十二相八十種好光明普曜如百千日心懷歡喜前禮佛足即以樵木奉施世尊世尊受已插著地中佛以神力令此樵木須臾之間枝條生長花果茂盛團圓可愛如尼拘陀樹世尊在下結跏趺坐為諸人天百千萬眾演說妙法貧人見已心懷喜悅即便以身五體投地發大誓願以此施佛樵木功德使我來世得成正覺廣度眾生成佛無異發是願已佛即微笑從其面門出五色光遶佛三市還從頂入爾

時阿難而白佛言如來尊重不妄有笑以何因緣今者微笑唯願世尊敷演解說佛告阿難汝今見是守園貧人施我樵木不阿難白言唯然已見彼貧人者以信敬心施我樵木善根功德於未來世經十三劫不墮地獄畜生餓鬼天上人中常受快樂最後身得成辟支佛號曰離垢廣度眾生成不可限量是故笑耳爾時諸比丘聞佛所說歡喜奉行

作樂供養成辟支佛緣二十九

佛在舍衛國祇樹給孤獨園時彼國中豪貴長者各自莊嚴著好服飾瓔珞環玕賚持香華作倡伎樂皆共相將欲出城外遊戲自樂到城門中值佛世尊將諸比丘著衣持鉢入城乞食時彼諸人見佛如來圓光晃昱三十二相八十種好光明暉曜如百千日各懷歡



喜前禮佛足作倡伎樂供養佛僧各以所捉種種雜華而散佛上於虛空中變成華蓋佛以神力遍覆舍衛時諸人等見是變已歎未曾有即便以身各各五體投地因發誓願以此作倡伎樂善根功德使我來世得成正覺廣度衆生如佛無異發是願已佛即微笑從其面門出五色光遶佛三匝還從頂入爾時阿難而白佛言如來尊重不妄有笑以何因緣今者微笑唯願世尊敷演解說佛告阿難汝今見此諸人等不阿難白言唯然已見此諸人等以其作樂散華供養善根功德於未來世一百劫中不墮地獄畜生餓鬼天上人中常受快樂最後身得成辟支佛皆同一號名曰妙聲廣度衆生不可限量是故笑耳爾時諸比丘聞佛所說歡喜奉行

劫賊惡奴緣三十

佛在舍衛國祇樹給孤獨園時彼城中有一愚人名曰惡奴心常好樂處處藏竄劫奪人物用自存活時有比丘在於冢間坐禪行道食時欲至著衣持鉢入城乞食時有長者見彼比丘威儀庠序心生信敬即入舍內取一張氎施彼比丘還詣冢間值彼賊人見是比丘持氎來至便從索取比丘即與明日更來復從索氎次復持與於第三日比丘乞食來至房內復從索鉢時彼比丘作是念言唯此一鉢當用乞食救濟性命彼賊復索無有厭足今當設計授三自歸治彼賊人今使不來作是念已即語賊言待我須臾止息小停當與汝鉢賊聞是語即便坐待比丘取繩張施縑索安置向內語彼賊言我今疲極不能故

